



REPUBLIKA E SHQIPËRISË
-AUTORITETI I KONKURENCËS-
KOMISIONI I KONKURENCËS

V E N D I M

Nr. 214, datë 24.01.2012

Mbi

“Autorizimin e përqendrimit të realizuar nëpërmjet shit-blerjes së 100% të aksioneve të shoqërisë BET-07 Sh.a”

Komisioni i Konkurrencës me pjesëmarrjen e:

- | | |
|----------------------------|---------|
| ▪ Znj. Lindita Milo (Lati) | Kryetar |
| ▪ Znj. Servete Gruda | Anëtar |
| ▪ Z. Koço Broka | Anëtar |
| ▪ Znj. Rezana Konomi | Anëtar |

Në mbledhjen e tij të datës 24.01.2012, shqyrtoi çështjen me :

Objekt: Autorizimin e përqendrimit të realizuar nëpërmjet shit-blerjes së 100% të aksioneve të shoqërisë BET-07 Sh.a nga personi fizik z. Glendi Abdi. Baza ligjore:Ligji nr. 9121, datë 28.07.2003 “Për Mbrojtjen e Konkurrencës”, neni 24, shkronja d, nenet 10-12, 13 dhe neni 15, në veçanti Kreu III “Përqendrimet e ndërmarrjeve” nenet 53-56, 58, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit ” dhe Formulari i Thjeshtuar “Për njoftimin e përqendrimit”.

Komisioni i Konkurrencës, pas shqyrtimit të raportit mbi njoftimin e përqendrimit BET-07 Sh.a – Z. Glendi Abdi dhe relacionit të Sekretarit të Përgjithshëm,

V Ë R E N S E:

1. Transaksioni dhe përqendrimi

Përqendrimi realizohet në bazë të ‘Kontratës për Shit-blerjen e Aksioneve’ e lidhur më datë 7 Dhjetor 2011, ndërmjet palëve z. Glendi Abdi (Blerësi) dhe z. Gertian Sula, z. Drini Skënderi, z. Albert Leka z. Artan Gaçaj dhe z. Leonidas Sampanis (të cilët veprojnë sëbashku si shitësit) me qëllim përftimin e kontrollit të BET-07 nga aksioneri i ri dhe i vetëm z. Glendi Abdi. Transaksioni përfshin blerjen 100% të aksioneve të shoqërisë target dhe si pasojë edhe kontrollin dhe menaxhimin e saj.

Përqendrimi shfaqet si një përftim kontrolli në formën e zëvendësimit të pronësisë nëpërmjet blerjes së tërësisë së aksioneve të shoqërisë target BET-07 Sh.a.

Transaksioni realizohet në formën e përftimit të plotë të kontrollit i cili në kuptim të nenit 10, pika 1, shkronja b) e Ligjit Nr. 9121, datë 28.07.2003 “Për mbrojtjen e konkurrencës” i ndryshuar (Ligji) është përqendrim.

Gjithashtu përqendrimi i njoftuar përmbush edhe kushtet e nenit 12 të Ligjit përsa i përket xhirove (neni 12/1) si dhe është njoftuar brenda afatit kohor të përcaktuar në të (neni 12/2).

2. Palët në transaksion

- Personi fizik **z. Glendi Abdi**, në cilësinë e **blerësit**, nuk zotëron asnjë aktivitet ekonomik dhe nuk është pjesëmarrës si ortak apo aksioner në asnjë ndërmarrje tregtare.
- **BET -07 Sh.a**, në cilësinë e **shitësit**, është një shoqëri e cila është themeluar dhe funksionon në bazë të Ligji nr. 10 033, datë 11.12.2008 “Për lojërat e fatit” i ndryshuar, me seli në adresën: Rr. Gjin Bue Shpata, 3/2, Tiranë. Shoqëria ushtron aktivitetin e saj në fushën e lojërave të fatit-baste sportive.

3. Xhiro për vitin 2010

- Xhiro totale në **tregun e brendshëm**: është XXXXX Lekë
 - **BET 07 Sha**: XXXXXX Lekë

Shoqëria, objekt i këtij transaksioni plotëson kriteret e xhiros të përcaktuara në nenin 12, pika 1 shkronja b) të ligjit “Për mbrojtjen e konkurrencës” dhe si rrjedhojë, ky transaksion është objekt autorizimi nga Komisioni i Konkurrencës.

4. Tregu Përkatës

Referuar nenit 3, pika 7, të Ligjit, përcaktimi “treg përkatës”, përfshin dy komponentë:

a) tregu i produktit, dhe

b) tregu gjeografik.

1. Tregu i produktit:

- **BET 07 SHA** ushtron veprimtarinë e saj në një treg mjaft specifik sic është ai i lojërave të fatit – basteve sportive. Shoqëria ofron shërbimin e lojërave të fatit – basteve sportive. Këto shërbime iu ofrohen konsumatorëve sipas koeficientëve të përcaktuar paraprakisht dhe ky konsiderohet produkt i saj.

Bazuar sa më sipër si dhe në përputhje me rregulloret dhe udhëzimet për përqendrimet:

Treg përkatës të produktit do të konsiderojmë ofrimin e shërbimit të lojërave të fatit – basteve sportive.

4.1.b. Tregu gjeografik

Shoqëria BET 07 SHA ushtron veprimtarinë e saj nëpërmjet 155 pikave të shitjes të shtrira në të gjithë territorin e Republikës së Shqipërisë. Shoqëria nuk operon në tregun ndërkombëtar për shkak të barrierave hyrëse dhe mungesës së një plan biznesi për shtrirje në tregun e huaj.

5. Struktura e tregut para dhe pas përqendrimit

Vlerësimi madhësisë së tregut, i pasqyruar dhe në tabelën e mëposhtme është bazuar në të dhënat mbi xhiron e realizuar nga shoqëritë e basteve sportive për vitin 2010. Në këtë treg operojnë 12 shoqëri të licensuara ku tre konkurrentët më të mëdhenj me pjesë tregu mbi 14% janë Top Start me 25.65% të tregut, Bet 07 me 22.45% të tregut dhe Lotto Sport me 14.72%.

Hyrja në këtë treg rregullohet nëpërmjet ligjit Nr.10033, datë 11.12.2008 “PËR LOJËRAT E FATIT”, i ndryshuar dhe realizohet me miratimet paraprake të institucioneve shtetërore kompetente. Tregu është i hapur për konkurrencë. Barrierat e hyrjes në treg përbëhen nga marrja e licencës sipas një procedure gare në përputhje me rregullat e përcaktuara në këtë ligj si dhe pagesën vjetore për ushtirimin e veprimtarisë për baste sportive, 2 000 000 (dy milionë) lekë pranë organit tatimor, ku është regjistruar shoqëria.

Transaksioni i realizuar konsiston në ndryshimin e strukturës së aksionerëve të shoqërisë BET 07 dhe nuk sjell asnjë ndryshim në strukturën e tregut të produktit. Fuqia në treg e shoqërisë objekt i transaksionit si dhe konkurrentëve të saj nuk do të ndryshojë. Për pasojë, transaksioni nuk do të ketë efekte negative mbi konkurrencën dhe konkurrentët në Shqipëri.

Pas realizimit të përqendrimit pjesa e tregut e shoqërisë BET 07 nuk ndryshon, si rrjedhojë përqendrimi i tregut mbetet i njëjtë dhe nuk kemi krijim ose forcim të pozitës dominuese në tregun përkatës.

Si konkluzion, përqendrimi i realizuar nuk shfaq shenja të kufizimit në mënyrë të ndjeshme të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese për shkak të përqendrimit në shoqërinë BET-07 Sh.a.

PËR KËTO ARSYE:

Në bazë të nenit 24, shkronja d, dhe nenit 56 pika 1, të Ligjit nr. 9121, datë 28.07.2003 “Për mbrojtjen e konkurrencës”:

VENDOSI:

1. Të autorizojë përqendrimin e realizuar nëpërmjet shit-blerjes së 100% të aksioneve të shoqërisë BET-07 Sh.a nga personi fizik z. Glendi Abdi.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Servete GRUDA

(_____)
Anëtar

Koço BROKA

(_____)
Anëtar

Rezana KONOMI

(_____)
Anëtar

Lindita MILO (LATI)

K R Y E T A R